

UREDBA O POSTUPKU FINANSIRANJA DIJELA MINIMALNE MJESEČNE NETO PLAĆE (U FBiH) ZA MJESEC JUNI I JULI 2020. GODINE*

(“Službene novine KS”, broj 49/20)

Član 1.

(Predmet Uredbe)

Ovom uredbom uređuje se način raspisivanja javnog poziva i rješavanje prijava, kriteriji za isplatu i način finansiranja dijela minimalne mjesečne neto plaće (u FBiH) za mjesec juni, odnosno juli 2020. godine, isplata sredstava i pravna zaštita poslovnih subjekata koji apliciraju na javni poziv.

Član 2.

(Javni poziv)

(1) Za finansiranje dijela minimalne neto plaće (u FBiH) za mjesec juni i juli 2020. godine Ministarstvo privrede Kantona Sarajevo (u daljem tekstu: Ministarstvo privrede) raspisuje javni poziv.

(2) Javnim pozivom iz stava (1) ovog člana pozivaju se poslovni subjekti koji ispunjavaju uslove propisane ovom uredbom da podnesu prijave za ostvarivanje prava iz stava (1) ovog člana.

Član 3.

(Prijava na javni poziv)

Poslovni subjekti, koji se prijavljuju na javni poziv, obavezni su dostaviti prijavu i dokumentaciju propisanu javnim pozivom iz člana 2. ove uredbe.

Član 4.

(Obrada prijava)

Pregled prijava i dokumentacije, obradu i kontrolu podataka, te ocjenu o ispunjavanju uslova vršit će stručna lica imenovana rješenjem Ministarstva privrede.

Član 5.

(Odluka o odobravanju i isplati sredstava)

Vlada Kantona Sarajevo (u daljem tekstu: Vlada Kantona) donosi odluku o odobravanju i isplati sredstava za finansiranje dijela minimalne mjesečne neto plaće (u FBiH) za mjesec juni i juli 2020. godine poslovnim subjektima koji ispunjavaju uslove, prema listi koja je sastavni dio ove odluke.

Član 6.

(Subjekti koji su isključeni iz finansiranja dijela plaće)

Sljedeći subjekti su isključeni iz finansiranja dijela minimalne mjesečne neto plaće (u FBiH) za mjesec juni i juli 2020. godine: javna preduzeća, javne ustanove, javne institucije, organi uprave, upravne organizacije, organi i jedinice lokalne samouprave, banke i druge finansijske organizacije (oblasti po KD BiH 2010: 64-66), subjekti koji obavljaju djelatnost kockanja i klađenja, udruženja, te fizička lica koja samostalno obavljaju registrovanu poslovnu djelatnost kao dopunsko zanimanje, a koja u skladu sa propisima o porezu na dohodak, porez na dohodak po tom osnovu plaćaju prema paušalnom utvrđenom iznosu.

Član 7.

(Uslovi za ostvarivanje prava na isplatu dijela plaće)

(1) Pravo na isplatu dijela minimalne mjesečne neto plaće (u FBiH) za mjesec juni i juli 2020. godine mogu ostvariti poslovni subjekti (pravna lica i fizička lica koja samostalno obavljaju registrovanu poslovnu djelatnost) koji ispunjavaju sljedeće uslove:

a) da poslovni subjekt nije subjekt iz člana 6. ove uredbe, tj. da nije subjekt koji je isključen iz finansiranja dijela minimalne mjesečne neto plaće (u FBiH) za mjesec juni i juli 2020. godine,

b) da poslovni subjekt ima sjedište u Kantonu Sarajevo, s tim da ovo pravo ne može ostvariti za poslovne jedinice u svom sastavu koje se nalaze izvan područja Kantona Sarajevo,

* Uredba je objavljena u “Službenim novinama KS”, broj 49/20 od 10. decembra 2020. godine, a stupila je na snagu 11. decembra 2020. godine. Uredba je donijeta na osnovu člana 2. stav (4) Zakona o ublažavanju negativnih ekonomskih posljedica i uštedama u Kantonu Sarajevo (“Službene novine Kantona Sarajevo”, br. 18/20 i 46/20).

c) da poslovni subjekt sa sjedištem izvan Kantona Sarajevo na području FBiH u svom sastavu ima poslovne jedinice koje se nalaze na području Kantona Sarajevo, s tim da ovo pravo može ostvariti samo za ove poslovne jedinice,

d) da u mjesecu junu 2020. godine, odnosno u mjesecu julu 2020. godine, poslovni subjekt iz tačke b) ovog stava ima pad prometa iz stava (2) ovog člana u odnosu na prosječni mjesečni promet u 2019. godini, odnosno poslovni subjekt iz tačke c) ovog stava ima pad prometa iz stava (3) ovog člana u odnosu na prosječni mjesečni promet u 2019. godini, kako slijedi:

1) veći od 30% do 50% ili

2) veći od 50%,

s tim da se ovaj uslov ne odnosi na poslovne subjekte iz stava (4) ovog člana.

e) da poslovni subjekt do dana objave javnog poziva ima izvršene obaveze po osnovu javnih prihoda sa danom 29.02.2020. godine i

f) da je poslovni subjekt iz tačke b) ovog stava bez poslovnih jedinica iz tačke b) ovog stava, odnosno da je poslovni subjekt u poslovnim jedinicama iz tačke c) ovog stava, odnosno da je poslovni subjekt iz stava (4) ovog člana, na dan 31.10.2020. godine zadržao najmanje 70% uposlenika u odnosu na broj uposlenika na dan 29.02.2020. godine.

(2) Promet za poslovni subjekt iz stava (1) tačka b) ovog člana, za ocjenu ispunjenosti uslova iz stava (1) tačka d) ovog člana, je ukupni promet ovog subjekta iz kojeg prometa je isključen promet poslovnih jedinica ovog subjekta koje se nalaze izvan područja Kantona Sarajevo.

(3) Promet za poslovni subjekt iz stava (1) tačka c) ovog člana, za ocjenu ispunjenosti uslova iz stava (1) tačka d) ovog člana, je ukupni promet svih poslovnih jedinica ovog subjekta koje se nalaze na području Kantona Sarajevo.

(4) Fizička lica sa sjedištem na području Kantona Sarajevo koja samostalno obavljaju registrovanu poslovnu djelatnost, a koja u skladu sa propisima o porezu na dohodak, porez na dohodak po tom osnovu plaćaju prema paušalnom utvrđenom iznosu (osnovno zanimanje i dodatno zanimanje), nisu obavezna da ispune uslov koji se odnosi na pad prometa iz stava (1) tačka d) ovog člana.

(5) Broj uposlenika za poslovni subjekt iz stava (1) tačka b) ovog člana, za obračun ukupnog iznosa za isplatu za odnosni mjesec je ukupni broj uposlenika ovog subjekta iz kojeg broja uposlenika je isključen broj uposlenika poslovnih jedinica ovog subjekta koje se nalaze izvan područja Kantona Sarajevo, na dan 30.06.2020. godine, odnosno na dan 31.07.2020. godine.

(6) Broj uposlenika za poslovni subjekt iz stava (1) tačka c) ovog člana, za obračun ukupnog iznosa za isplatu za odnosni mjesec je ukupni broj uposlenika svih poslovnih jedinica ovog subjekta koje se nalaze na području Kantona Sarajevo, na dan 30.06.2020. godine, odnosno na dan 31.07.2020. godine.

Član 8.

(Maksimalni dio plaće koji se može isplatiti)

(1) Poslovnom subjektu iz člana 7. stav (1) tačka b) ove uredbe i člana 7. stav (1) tačka c) ove uredbe, koji ispunjavaju sve potrebne uslove za mjesec juni, odnosno mjesec juli 2020. godine, za broj uposlenika iz člana 7. stav (5) ove uredbe, odnosno iz člana 7. stav (6) ove uredbe može se isplatiti dio minimalne mjesečne neto plaće (u FBiH) po uposlenom, kako slijedi:

a) do 50% minimalne mjesečne neto plaće (u FBiH) za subjekte koji imaju pad prometa veći od 30% do 50%,

b) do 100% minimalne mjesečne neto plaće (u FBiH) za subjekte koji imaju pad prometa veći od 50%.

(2) Poslovnom subjektu iz člana 7. stav (4) ove uredbe, koji ispunjava sve potrebne uslove za mjesec juni, odnosno mjesec juli 2020. godine, za broj uposlenika na dan 30.06.2020. godine, odnosno 31.07.2020. godine, može se isplatiti do 50% minimalne mjesečne neto plaće (u FBiH) po uposlenom.

Član 9.

(Utvrđivanje iznosa dijela plaće za isplatu)

Vlada Kantona će odlukom utvrditi iznose dijela minimalne mjesečne neto plaće (u FBiH) iz člana 8. ove uredbe za mjesec juni, odnosno za mjesec juli 2020. godine.

Član 10.

(Objava listi poslovnih subjekata)

(1) Ministarstvo privrede objavljuje Listu poslovnih subjekata koji ispunjavaju uslove, kao i Listu poslovnih subjekata koji ne ispunjavaju uslove.

(2) Liste iz stava (1) ovog člana objavljuju se na web stranici Ministarstva privrede Kantona Sarajevo: <http://mp.ks.gov.ba/>.

Član 11.

(Pravna zaštita)

(1) Poslovni subjekt iz člana 10. ove uredbe može uložiti prigovor komisiji putem Ministarstva privrede, u roku od sedam dana od dana objave listi iz člana 10. ove uredbe.

(2) Komisija rješava po prigovoru iz stava (1) ovog člana najkasnije u roku od 60 dana od dana podnošenja prigovora poslovnog subjekta.

(3) Komisiju iz stava (1) ovog člana imenuje Vlada Kantona na prijedlog Ministarstva privrede.

Član 12.

(Saradnja sa Privrednom komorom Kantona Sarajevo)

Obrada prijava iz člana 4. ove uredbe i isplata sredstava iz člana 5. ove uredbe poslovnim subjektima iz člana 7. tač. b) i c) ove uredbe i člana 7. stav (4) ove uredbe po odluci Vlade Kantona iz člana 5. ove uredbe, vrši se u saradnji sa Privrednom komorom Kantona Sarajevo, o čemu Vlada Kantona zaključuje sporazum sa Privrednom komorom Kantona Sarajevo.

Član 13.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".